

Meerartaarnermut atatillugu Nunatsinni tulluarsakkamik aningaasaateqarfiliornissamut periarfissanik misissuinisseq siunertaralugu Naalakkersuisut suliffeqarnermik suliaqartunut isumaqatigiinniarnissamik aallarnisaanissaannut peqquneqarnissaannik Inatsisartuni aalajangiiffigisassatut siunnersuut. Meerartaarnermut atatillugu aningaasaateqarfiup akissarsiallit tamakerlutik maanna ullormusiaqartitsinermit pitsaanagerusumik atugaqalernissaat qulakkiissavaa.
(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Aningaasaqarnermut Nunamullu Namminermt Naalakkersuisoq)

Siullermeerneqarnera

Naalakkersuisut Kalaallit Nunaanni meerartaarnermut atatillugu aningaasaateqarfimmik atuutsilersinissaq pillugu aalajangiiffigisassatut siunnersuummut qujapput aamma siunnersuummi anguniakkanut isumaqataapput.

Naalakkersuisulli isumaqarput meerartaarnermut atatillugu isumaqatigiissutit aningaasaqarnikkullu atugassarititaasut suliffeqarfimmi illuatungeriit isumaqatiginninniutigisassagaat.

Ullumikkut kattuffiit arlallit pisortanut isumaqatigiissutit malillugit meerartaarnermut atatillugu tamakkiisumik aningaasarsiaqartitsinissaq pissarsiarinikuuat. Meerartaarnermut atatillugu aningaasaateqarfiliortoqarpat kattuffiit taakku eqqunngitsuliorfigineqartutut misigisimassapput, tassami isumaqatiginninniarnermi aningaasarsiaannut ataasiarlutik akiliuteqareeramik. Kattuffiit pineqartut tullissaanik isumaqatiginninniarnermi taarsiiffigineqarnissamik piumasaqarnissaat ilimanarpoq, taamaattoqassappat kommunitumut nunattalu karsianut tamanna aningaasartuutaassaaq. Suliffeqarfiit namminersortut taamatut tunngavilersuuteqarnissaat aamma ilimanarpoq.

Naalakkersuisut nunami allaffissornerq ajornaannerulersinniarlugu siunnerfeqartumik suliaqarput -tassa namminersortut pisortallu allaffissorneri eqqarsaatigalugit. Meerartaarnermut atatillugu aningaasaateqarfiup atuutsinneqalerneratigut namminersortuni pisortanilu sulisitsisut allaffissornermut aningaasartuuteqalissapput. Taamaalisoqarnissaa Naalakkersuisunit kissaatigineqanngilaq.

Akerlianik Naalakkersuisut inassutigaat kattuffiit isumaqatiginninniarnermi aningaasatigut atugassarititaasut iluini ilaqutariinnut meerartalinnut atugassarititaasunik pitsanngorsaaqataassasut.

Aningaasaqarnikkut ajunngitsumik atugaqarneq pingaaruteqarluinnarpoq meeqqap pitsaasumik alliaartornissaanut, taamaammat meeqqat ilaqutariillu meerartallit atugaasa pitsanngorsaafiginissat sulissutiguartariaqarpoq. Politikkikkut suliniutit meeqqat alliaartormermi atugaannik pitsanngorsaa-taasussat pisariaqartinneqarput. Naalakkersuisut kissaatigaat tamanna pitsaanerpaamik angusaqarfiusussanngorlugu ataqatigiissaakkamik suliaqarneq aqutigalugu pissasoq. Taamaammat inuiaqatigiinni kikkut tamarmik suliffeqalernissaat qulakkeerniarlugu Naalakkersuisut suliaqarput, taamalu inuiaqatigiinni kikkut tamarmik, ilaqutariit meerartallit kisimik pinnatik, aningaasaqarnikkut ajunngitsumik atugaqalernissaat qulakkeerneqassalluni.

Tamanna tunngavigalugu siunnersuut taamatut isikkoqartillugu Naalakkersuisut tapersorsinnaanngilaat.